

太上老君說常清靜經。

老君曰

大道無形。生育 天地。大道無情。運行 日月。大
道無名。長養萬物。吾不知其名。強名曰道。夫道者。
有清有濁。有動有靜。天清地濁。天動地靜。男清女
濁。男動女靜。降本流末。而生萬物。清者濁之源。動
者靜之基。人能常清靜。天地悉皆歸。夫人神好
清。而心擾之。人心好靜。而慾牽之。常能遣其慾。而

心自靜。澄其心。而神自清。自然六慾不生。三毒消滅。所以不能者。為心未澄。慾未遣也。能遣之者。內觀其心。心無其心。外觀其形。形無其形。遠觀其物。物無其物。三者既悟。惟見於空。觀空亦空。空無所空。所空既無。無無亦無。無無既無。湛然常寂。寂無所寂。慾豈能生。慾既不生。即是真靜。真常應物。真常得性。常應常靜。常清靜矣。如此清靜。漸入真道。既入真道。名為得道。雖名得道。實無所得。為化眾

生名為得道。能悟之者。可傳聖道。

老君曰

上士無爭。下士好爭。上德不德。下德執德。執著之者。不名道德。眾生所以不得真道者。為有妄心。既有妄心。即驚其神。既驚其神。即著萬物。既著萬物。即生貪求。既是貪求。即是煩惱。煩惱妄想。憂苦身心。便遭濁辱。流浪生死。常沉苦海。永失真道。真常之道。悟者自得。得悟道者。常清靜矣。

○葛仙真人讚

真人曰。吾得真道。曾誦此經萬遍。此經是天人所習。
不傳下世。吾昔受之於 東華帝君。 東華帝君
受之於 金闕帝君。 金闕帝君受之於
西王母。 西王母皆口口相傳。不記文字。吾今於世。書
而錄之。上士悟之。昇為天官。中士修之。南宮列仙。
下士得之。在世長年。遊行三界。昇入金門。

清靜經終